



**Republika e Kosovës**  
**Republika Kosovo-Republic of Kosovo**  
*Kuvendi - Skupština - Assembly*

---

Legjislatura III  
Sesioni pranveror

Mbledhja plenare e Kuvendit  
P- 122  
Prishtinë, më 23 korrik 2010

**PROCES\VERBAL**

**I MBLEDHJES PLENARE TË KUVENDIT TË REPUBLIKËS SË KOSOVËS, TË  
MBAJTUR MË 23 KORRIK 2010**

Mbledhjen e drejtoi **Jakup Krasniqi**, kryetar i Kuvendit, kurse i ndihmoi **Xhavit Haliti**, anëtar i Kryesisë së Kuvendit.

Ai i njoftoi deputetët se Kryesia e Kuvendit, në marrëveshje me kryetarët e grupeve parlamentare, ka përgatitur dhe Kuvendit ia ka paraqitur rendin e ditës për mbledhjen e sotme plenare, e cila do të ketë vetëm një pikë të rendit të ditës:

- **Miratimi i Deklaratës për mbështetjen e mendimit të Gjykatës Ndërkombëtare të Drejtësisë**

Kryetari **Jakup Krasniqi**, paraqiti tekstin e Deklaratës lidhur me opinionin e Gjykatës Ndërkombëtare të Drejtësisë për ligjshmërinë e shpalljes së pavarësisë së Kosovës.

Duke çmuar lart opinionin e Gjykatës Ndërkombëtare të Drejtësisë, të shpallur më 22 korrik 2010, për ligjshmërinë e Deklaratës së Pavarësisë së Kosovës dhe në mbështetje të nenit 65.1 të Kushtetutës dhe në nenin 6.1 të Rregullores së vet të Punës, Kuvendi i

Republikës së Kosovës, në mbledhje plenare të veçantë të datës 23 korrik 2010, miraton solemnisht këtë:

## DEKLARATË

Kuvendi i Republikës së Kosovës shpreh kënaqësinë dhe aprovimin për opinionin e Gjykatës Ndërkombëtare të Drejtësisë për legalitetin ndërkombëtar të shpalljes së pavarësisë së Kosovës dhe zotohet për respektimin e tij.

Gjykata Ndërkombëtare e Drejtësisë, me profesionalizëm të lartë dhe paanshmërisht ka rikonfirmuar respektimin e të drejtës ndërkombëtare me rastin e shpalljes së pavarësisë së Kosovës, duke i dhënë vulën e ligjshmërisë vullnetit të shprehur të qytetarëve të Kosovës dhe të drejtës së tyre për vetëvendosje.

Duke i dhënë legalitetin ndërkombëtar Deklaratës së Pavarësisë, Gjykata Ndërkombëtare e Drejtësisë i ka hapur rrugë të reja Republikës së Kosovës drejt njohjes së gjerë ndërkombëtare, drejt marrëdhënieve me vende dhe popuj anekënd botës, drejt bashkëpunimit rajonal dhe drejt zhvillimit e integriteteve euroatlantike.

Kuvendi i Republikës së Kosovës shpreh bindjen se vendimi historik i Gjykatës Ndërkombëtare të Drejtësisë do t'i kontribuojë paqes dhe stabilitetit jo vetëm në Republikën e re të Kosovës, por në gjithë rajonin tonë, sepse Kosova do të jetë e përkushtuar fuqishëm të respektojë të drejtën ndërkombëtare, të ndjekë besnikërisht politikën e bashkëpunimit, të fqinjësisë së mirë dhe mirëkuptimit e dialogut.

Shprehim gatishmërinë tonë të sinqertë për të vendosur marrëdhënie të mira me Republikën e Serbisë në të mirë të të dy popujve tanë dhe të stabilitetit e prosperitetit politik, social dhe ekonomik të rajonit tonë.

Kuvendi i Republikës së Kosovës përshëndet ftesën e djeshme të Bashkimit Evropian për fillimin e dialogut midis Kosovës dhe Serbisë, në dobi të zgjidhjes së çështjeve teknike dhe të interesit të përbashkët e të qytetarëve të të dyja vendeve, duke përjashtuar njëkohësisht çfarëdo mundësie të negociimit të statusit politik të Kosovës, të integritetit territorial dhe të kushtetutshmërisë së saj.

Kuvendi i Republikës së Kosovës falënderon të gjitha shtetet që e kanë përkrahur Kosovën në të gjitha proceset politike dhe sidomos për kontributin e tyre në Gjykatën Ndërkombëtare të Drejtësisë, duke u zotuar se Kosova do ta arsyetojë plotësisht besimin ndërkombëtar.

Shprehim mirënjohjen tonë dhe të të gjithë popullit të Republikës së Kosovës për institucionet ndërkombëtare, komunitetin ndërkombëtar në përgjithësi dhe sidomos për SHBA, BE, dhe të gjitha shtetet veç e veç që e kanë njohur shtetin e pavarur dhe sovran të Kosovës, me bindjen se edhe shtete të tjera do ta njohin Republikën e Kosovës, si anëtare të ardhshme të bashkësisë së kombeve të lira dhe demokratike.

Kuvendi i Republikës së Kosovës me këtë rast solemn i shpreh edhe njëherë mirënjohjen e thellë gjithë prezencës ndërkombëtare në Kosovë, civile dhe asaj të sigurisë, duke vlerësuar lart kontributin e saj.

Duke pasur parasysh konfirmimin ligjor ndërkombëtar të pavarësisë dhe të sovranitetit të Republikës së Kosovës, i bëjmë thirrje Bashkimit Evropian për unifikim të plotë për Kosovën, por edhe shteteve që kanë hezituuar ta njohin shtetin tonë, ta bëjnë këtë në emër të paqes e të zhvillimit, në emër të marrëdhënieve të mira e miqësore midis Kosovës dhe popullit të saj me vendet dhe popujt e botës, në emër të së drejtës legjitime të Kosovës për të qenë anëtare e denj e familjes së madhe të Kombeve të Bashkuara.

Kuvendi i Republikës së Kosovës i kërkon Qeverisë të angazhohet intensivisht në aktivitetin politik e diplomatik të njohjes së gjerë ndërkombëtare të Republikës së Kosovës.

Republika e Kosovës edhe njëherë konfirmon zotimin e saj të shprehur në Deklaratën e Pavarësisë për të qenë një shtet demokratik, laik dhe multietnik, i udhëhequr nga parimet e mosdiskriminimit dhe të mbrojtjes së të drejtave të të gjitha komuniteteve në Kosovë dhe të krijojë kushtet e nevojshme për pjesëmarrjen e tyre efektive në proceset politike dhe vendimmarrëse.

Institucionet e Republikës së Kosoves do të jenë të përkushtuara për përgatitjen e shtetit tonë për integrimet euroatlantike dhe për t'i respektuar e përvetësuar të gjitha vlerat evropiane e euroatlantike.

Kuvendi me aklamacion miratoi deklaratën e paraqitur nga kryetari i Kuvendit.

Kryetari i Kuvendit,

**Jakup KRASNIQI**

Përgatiti: Divizioni për Çështje Plenare dhe Procedurale